

龍山縣志卷之三

山水

顯登者以貴途易引立德者以幽陋好遺范史之言如是然非獨人材然也邑山水之區或奇險若三峽或深窾盤折若武夷九曲至其崖壁佛迹古洞仙靈名勝者不尠也而古今圖志絕所稱載則亦幽陋之爲累也然浙之雁宕闢於謝靈運柳之西山石澗著於柳宗元是烏知邑之山水固終蒙閤不彰乎爰採錄於篇後之耽雅游而工詞章者當無更遺焉

龍山縣志

卷之三

山水

一

洛塔山 在縣南六十里穹窿冠羣岫四時雲霧環擁遙望不見其巔綿亘百二十餘里西北懸崖萬仞巖色青白斑然無樹木猿獍鮮至者東南稍斜衍通登降約二十餘徑然皆由纍石叢榛間一線盤屈而上其嶮岨處行者前後頂趾相摩咸豐辛酉土人爲防寇並各徑掘斷之寇至知不可上乃舍而去頂寬平居民數百家多腴土可種蒔有洞曰響水洞出原泉供吸飲古木蕭森盛夏烈風稜稜然有麀鹿諸獸無烏雀山頂更戴一峯尤峻嶒上有舊廳趾曰吳著廳卽蠻酋吳著冲困沒

處峯巔有天然井水深碧大旱不涸魚皆生綠毛人跡罕到

石塔山 在縣南七十里狀如浮屠類巧工削成者分三層漸殺而上高千丈土人名自生塔

天竹山 在縣南九十里被山皆叢竹山下有塘土人呼爲熱湖四時浮翠滴青與天光水色相映煙雲環帶望之深秀蔚然

觀音山 在縣南十五里狀類大士跏趺蓮臺上冠髻皆具俗呼觀音座有小山二列左右曰鐘山鼓山亦以

龍山縣志

卷之三

山水

二

其狀名之山下清溪環抱曲折而去

靈姑山 在縣南二百里上有飛來石如菩薩狀髣髴瓔珞望之宛然土人爲建廟其處祈禱甚靈每歲八月朔望日進香者不絕

三尖山 在縣南四十里三峯排列皆出羣中高左右稍殺遙望如文房架筆具上產黃連黃芩諸藥

八面山 在縣西南一百八十里較洛塔巖尤高鉅據湖南四川兩邊境遙望正方而橢廣六十里袤二百餘里層崖邃谷叢菁幽林卽山居者終身難窮其處其山

分兩層山半曰二巖自上陡削而下至此地平出較山頂闊衍十之四頂上尤坦夷縱橫共百里土沃可蒔雜糧有天潭大魚潭青魚潭水淵深大旱不涸出巨魚長二三尺土人歲時取以供饌閒夷地作町畦引潭水灌之以藝稻禾所出與下方田畝等場圃桑麻別開境界山半亦多沃土可種蒔民居數十家或架樹枝作樓或兩樹排比作門戶至崖盡處則萬樹葱蘢環擁於外若欄柵然風氣常肅肅居民於四時不知有夏山頂雲氣籠罩非晴明不見遙望山半廬舍鱗次竹杉掩映宛然

龍山縣志

卷之三

山水

三

懸壁畫圖聞雞犬聲皆在天上自下而升並險巖石磴盤旋路斷處有古松橫臥作橋梁行者援枝踏樹而過至頂約三十里山東北爲縣境西爲四川酉陽州境西南秀山縣境

金斗坡 在縣西南五里山不甚高大體秀削如斗形泥石色赭黃舊呼之爲金斗咸豐中農民覃某鋤土得一器狀正方而橢中空斑青綠屢拭之不減扣之聲鏗然上有蓋一狻猊蹲蓋上旁有庀底刻古篆文剝蝕不可認高三尺徑五寸重十六斤置諸室夜數有光意爲

前土司所遺卽金斗也坡或並以此名又金斗山在縣南二百里隆頭鎮北岸

太平山 有二一在縣北三十里平地孤峯巖劣西臨周道東南大河迴抱皆削起百十丈屹然如崇城惟南面石岡稍斜衍形如伏鼇鼇脊上磴道層疊通登陟然道左右無寸土不生樹木行者常懸然絕扳倚逾岡半徑尤險絕前人之足如踐後人之頂山巔廟舍參差隨地勢高下西嚮懸崖處有疊閣重樓倚崖外樹枝爲欄楯其簷雷嘗直下瀉於道登樓而望見飛鳥之背視道

龍山縣志

卷之三

山水

四

上牛馬混然不辨形至東南懸崖俯聽河流聲殷然如雷奮地底山爲動搖廟左立方石中一圻長二寸泉水從圻中出味甘馨傍石根有窪井蓄之足供汲取廟後沃土畝餘編竹爲籬蒔蔬菜古木蕭森其根如虬龍從石罅盤繞穿插少附著於土者僧人樵採所經半梯樹根爲上下山峻極絕人蹤故僧之清修者常居之道光初有由火解化者先趺坐薪上敲桐魚誦經及火起燎其股猶誦不輟逮腹始以桐魚並經擲下旋有白蜚隨煙上翀久之乃滅一在縣南招頭寨頂有菴名紫雲

天馬山 有二一在縣東烏鴉河孤巒屏立懸崖上有石凸出如馬形尾鬣宛然昂首軒蹠具騰蹕之勢一在縣西南賈田溪層巔雲氣滃蒸雖大旱俄傾必雨其左右山常有雲然以卜雨候則不如其驗

桂英山 在縣東北五十里多桂樹居民數十家花時紛然黃雪點綴茅舍竹籬山徑出入有香風爲迎送山下一溪環抱水甘冽居民取以烹茶采落英入湯內其味清馥異常

獅子山 在縣東十里如狻猊蹲踞狀草木蒙被毳毼

龍山縣志

卷之三

山水

五

卷然首北嚮有洞穴如獅張口者穴容數十人中有確磨蹟相傳爲前人避兵所遺咸豐十一年粵寇犯境里人結砦其上寇不能攻望而去山極崇峻坳城巒岫四周以此爲冠領

沙子坡 在縣南二十五里舊名老鄉臺其徑自下直上少盤折積徑皆沙石子偶雨雪卽滑澆難於行頂如甕口多大風貫入勢猶列撲人極晴明未嘗息嘉慶十八年知縣朱沛霖捐廉建廟宇其上易山名曰鎮風山龍潭岩 在縣西南三十里兩山對峙中貫一溪路右

盡渡溪而左由山根直上百數十武忽橫折緣石壁斜上其徑環山腰如帶上下削立各百十丈徑陜阨自下而望層級皆平沒行人如懸附壁上足踏空無所著者下溪水怒鳴震掉足根上巨石纍然凸出垂徑外多圻痕如欲墜而壓其首如是者凡里餘乃越山而去道途險艱以茲稱首

翻香坡 在縣南一百一十里山高矗樹林陰翳泥徑縈紆半從林隙出入四時煙霧繚繞不散行者前後以聲相聞而已

龍山縣志

卷之三

山水

六

穿洞坡 在縣西南七十里山足巨石屏立中一穴如門容數人並肩出入山半崖形窪然廣長如廳廊山頂石錯月列覆如簷石磴層疊由山足坎壘直上里餘轉入窪內斜上而達於頂道間石髓滴瀝晴日疑雨隆冬冰柱懸列晶瑩晃人行者如游珠樹琪林中山頂爲洛塔巖

猴子坡 在縣東三十里古樹蟠虬懸崖上有洞穴猿獠羣居之時扳藤葛上下不避人或戲滾石道間以駭行者坡以是得名初往永順道必經此今轉道陽雀坡

人罕過者

陽雀坡 在縣東三十里山骨隆起如魚脊初險削無路乾隆戊寅知縣錫占命工鑿磴道其上隨石脊起伏迤邐凡數里然右濱絕壑石稜列刃向上左臨深澗水陰黑不可測視猴子坡爲捷徑而險過之

鐵鑪坡 在縣東南八十里岡巒迤邐脈絡與金斗山相連自下而升約十餘里磴道摺疊行者前後相累積山巔人影如貼天上左荒坵斜衍奇石側立森然鬼物欲攫人右俯絕壑懸水陡注四時煙霧不散雷聲東走龍山縣志

山水

卷之三

七

崖壁動搖將隨流而去叢榛灌木氣象陰黑時有虎豹藏其中登高迴首萬峯擁簇指紅岩墟市惟見炊煙從山際出而已坡爲往郡要道

順江巖 在大喇里北河岸崖壁千尋直插霄漢河流悍疾舟行其間如渡巫峽山腰窄徑一線崖外虬松枝柱欄楯延緣行者如逾棧道河右界保靖縣

馬鞍山 有二一在縣南九十里一縣北七十里山形前後凸起中微凹類馬鞍故名

向上臺 在縣東四十里由三十六灣屈曲而上距石

壹半里聞有聲匉匉碾半空者卽瀑布也以前途石扇錯出如門掩半扉更一折乃見之山足石磴矗起倚懸崖斜上險絕處有石欄迴擁之山半石臺巋然凸出懸崖外廟舍踞臺頂甚幽陬足少憩於是行人高與瀑布源齊聽水落聲轉在地底初名望鄉臺嘉慶間知縣朱沛霖更名向上

黃連界 在縣東北八十里山廣袤踞桑植縣及湖北宣恩縣界上坦夷土沃蕃稌糧居民數百十家多烈風屋瓦常飛去民廬半覆以板產黃連黨參諸藥

龍山縣志

卷之三

山水

八

三塘山 在縣南十五里山下有三塘故名塘各周數畝水深碧莫測其底相距皆半里餘第三塘水日三潮潮時溢出塘外十數丈居民多架竹筧引水至廚舍溪環澗抱雲碓高下舂聲四聞

鍋羅山 在縣南九十里石岡合沓中抱巨壑外溪澗環帶岡脊上危徑一線隨繚曲爲往復前後行人可對語然一縱一折約數里始及

馬鹿山 在縣南明溪里兩峯對峙形如馬鹿中有池水極清澈雨旱無增減

五里牌 在縣東南董補里懸崖千仞中有石凸出如列屏形方正合繩削縱橫各丈餘崖石純青此獨瑩白類玉石

五指峯 在縣南一百六十里洗車溪西岸五峯環列圓纖如玉笋高矗雲霄儼然巨靈伸一臂

文筆山 在縣南一百六十里洗車溪南岸孤峯森秀狀如筆故名約高三百餘丈

雞公山 在縣東四里

舍人坡 在縣南一百五十里

龍山縣志

卷之三

山水

九

火石坡 在縣南一百八十里

揚山坡 在縣南一百五十里

土老虎坡 在縣南一百五十里

凡坡 在縣南一百二十里

長坡 在縣南五十里

岩峯塘 在縣南坡腳里界永順縣舊名三腳岩

補了坡 在縣南一百二十五里

鞋面坡 在縣西南九十五里

苦土坡 在縣西南一百里

雷公坡 在縣南一百里

馬道坎 在上梭溝

仙人岩 在縣北三十里下有洞曰仙人洞

分水嶺 在縣東北一百三十里

象鼻嶺 在縣北五里

馬鬃嶺 在縣南九十里

遶坡 在縣北二十里

通岩 在縣南一百五十里

賴竹坡 在縣南一百五十里

龍山縣志

卷之三

山水

十

紅旗坡 在縣北八十里

顯名塔 在縣東六十里

朵松嶺 在縣西南一百六十里

朵古坡 在縣西南一百六十里

賈閣山 在縣南一百七十里

累古坡 在縣南一百六十里

石鐵坡 在縣南二百一十里

亢斗山 在縣南三十里

雲龍山 在隆頭鎮北岸

牛角山 在縣南二百五十里界保靖縣芭茅砦

交椅山 在縣南一百四十里

五溪坡 在縣南二百四十五里與秀山縣濫泥灣界

苦竹坡 在縣南二百四十里

尖山 在縣南一百三十里

沙子堡 在縣南二百三十里

累人坡 在縣西南一百三十里

思慮坡 在縣南二百四十里

馬鬮坡 在縣南一百七十里

龍山縣志

卷之三

山水

十一

靈旗山 在縣南一百六十里

相見坡 在縣南一百六十里

白水河 源有二皆在湖北宣恩縣忠崗里地一出燕子岩東流五十里由秦家山至細沙溪折而北二十里

至畚刀溝一出歇落寨北流四十里由大河壩將軍橋

至畚刀溝合北流二十里至葉家渡入龍山北境北流

六十里至正南壩折而西流三十里至水寨果利河自

東南注之又西流三十里至仙人洞龍潭河水自西北

注之西南流六十里至漫水卯崗二梭里鵬子岩梭西

湖諸水自東南合注之自此以上不通舟楫爲卯崙阻由卯崙伏而出又西南流十五里至百戶司明溪里貴塘壩古渡溪諸水五寨里皮度河水自東南注之又南流十五里至犀牛灘三十五里至大溪口又五十里至西楚又三十里至后溪五十里至石隄三十里至里耶楊家溪吳家溪水自西北注之又六十里至隆頭洗車溪賈家寨諸水自東南注之又南流三十里至芭茅寨出龍山境是水爲邑水宗幹環邑三面綿亘五百二十餘里凡鄰州縣多距以爲界葉家渡而下界宣恩大潭

龍山縣志

卷之三

山水

十二

口而下界來鳳大溪口界西陽秀山石隄而下界保靖永順其間自漫水至犀牛灘雖全入來鳳境自大溪口至石隄雖全入西陽境而其他皆劃兩岸爲疆隅也果利河 源出白岩里魚泉洞由上母池下母池東流至猛崗河列筆車水注之至興洞橋苦竹河水注之至劉家壩高橋河雞公寨水注之東折而南至江西寨河底有洞陰黑不可測亂石礚礚亘洞上春時水自洞湧起冒於石高河水者數尺魚隨而躍出逆流向上漁人編竹具承石間多躍入者故名跳魚洞更南流至水寨

小龜潭入白水河

高橋河 在縣南十里源有三一出三塘一大井一營房溝至洗羅里迴龍山合流南經十字坪至石槽河皆石中一穴陰黝不可測有呱呱魚長五六尺額作紫色夜有光嘉慶間一漁者見之鉅巨鈎貫猪脬置穴中魚隨鈎跳而出張口噴沫若欲逐人齧之者漁者駭絕棄鈎走自是見者輒病由石槽下至雞公寨會茨岩塘水至劉家壩兩河口入果利河

苦竹河 在縣北二十里源出白岩里東流合岔溪河

龍山縣志

卷之三

山水

十三

水至新洞橋入果利河

補家河 在縣西南十五里源出洗羅里黃家灣西流經土戶車注高洞出白楊坪入白水河

龍潭河 在縣南三十里源出落塔山分兩支一注小龍潭一經十道河合洞金溝水下注吳必洞出干溪壩入白水河

皮度河 在縣西南七十里源出五寨里萬家棚經巖門口招頭寨入臘腳夾岩洞伏流六七里出火燒岩至兩河口入白水河

賈家寨河 在縣南一百六十里源有二一出五寨里金線湖一出四甲里內溪棚至土車合流至賈家寨冷水溪注之至慶口注洗車溪出隆頭鎮入北河

正河 在縣南一百七十里卽艾葉下流也溪源出董補里新寨塘東流經興隆橋艾葉溪折而南至坡腳里店房河有古木沈沙石間大十圍枝向上自水面望之蜿蜒如虬龍苔蘚斑然鱗鬣揚動土人以爲靈大旱集眾涸水出其枝滴牲血枝上拜酬之祈雨澤立降由店房更南流至梁家寨合洗車溪水出隆頭鎮入北河

龍山縣志

卷之三

山水

十四

汝池河 在縣東一百四十里源出辰旗里烏鴉河嶺合崖迴一水曲注路斷續錯兩岸行者時左時右約四十八渡乃止西流由三腳岩卜龜潭灰撲潭約二百里至撒湖守車入永順界由府西南境盤折出列夕入北河

烏鴉河在縣東九十里源出山洞循山西流至夾水洞復伏入不知所達

三十六灣河 在縣東三十里源出茨岩塘出水洞卽瀑布泉下流也碧瀨漩瀠峯迴路轉行者時出沒隱見

前後十步外卽不相見約三十六折乃已流十餘里又有泉一道從山腰湧出隨石級層疊而下注於河土人於流湍高低處次第架水臼磨以舂稻磨香屑濺雪轟雷轉輪舉杵聲徹山谷春時花柳夾岸紅綠繽綸鳩語鶯歌與水聲相應和行者快之瀑布泉落處岌業多大石中一穴甚深窅穴有蠃身巨如盆背綠毛起光芒時出石上吐氣成綺霞與雪練晶簾相激射五色光煊艷照動崖壁由三十六灣而下東流經長官橋普口車雞公寨至劉家壩入果利河

龍山縣志

卷之三

山水

十五

洗車溪 在縣南一百六十里卽紅巖溪下流也源出辰旗里比沙溝東流至紅巖溪下經比洞至梯子岩折而南至洗車溪溪左右倚山爲岸市廛排列屋瓦鱗次隨山勢高低沙淨水明樓閣涵影溪上石橋平闊覆以長廊併連左右廛舍輕舟上下浪雲瀉春溪右落塔岩水注之澗流斜交形如丁字略約橫架垂陽夾陰紅牆白板村舍縱橫雞犬之聲與兩岸相應竹樹參差炊煙出沒三山屏擁嵐翠迸流如隔人境由洗車溪南流至貓兒灘撈車溪正河兩水左右注之更南流至慶口浦

車溪牛欄溪水右注之更南流出隆頭鎮入北河溪水可通小舟若貨具多則用眾舸分載之出隆頭鎮乃併入大舟

撈車溪 在縣南二百里有三源一出本境一卽洗車溪下流一正河下流至梁家寨與正河合至義車溪與洗車溪合鏡流洑渟沙隄柳綠蓑網曬晴漁舟輕蕩左右方田如罽岡壠延緣茅舍竹籬煙林環帶莎草牛羊牧歌隱約里中人課雨占晴不譚世事詢比戶無甚富貧者遠流平沒疑前無路更數折皆復有境如前由撈龍山縣志

卷之三

山水

十六

車二十里至貓兒灘又二十里至慶口賈家寨水自南注之又十里至隆頭入北河

臘竹江 在縣南二百里合撈車溪下流入北河

鎖虎溪 在縣東南注義車溪入北河

龍洞 在東北五十里黃連界山下口如甕自上斜而入中窾冥有巨潭陰碧不見底水面涎沫洄湧風獵獵吹氣作魚腥土人謂龍蟠其中故名左右二小竇低於洞口暗與潭通水瀲灩迸竇出注溪澗大旱不涸潭嘗日三潮潮時玉屑珠塵懸射洞外丈餘地而左右轉縮

流如吸入者潮後仍迸竇出無涓滴及洞中旱時里人
刳牲禱雨立應

響水洞 在縣南落塔山距洞右數里地別一洞在山
足如巨魚口澗笄上張有泉如匹練出山腰飛落注洞
口中伏流不見至此洞復溢出噓沫噴珠水勢湯沸崖
竅砢砢聲如鐘鼓洞故以此名由洞南流二十里注洗
車溪入北河

浦車溪 源出塘口新寨至慶口入洗車溪

牛欄溪 源出洗那車至慶口入洗車溪

龍山縣志

卷之三

山水

十七

冷水溪 源出黑龍界流注賈家寨河

吳家溪 吳家溪爲水源流至內夕棚與踏竹坪水會
至斜烏與梓木溪水會歷長灘入北河

楊家溪 源出八面山經卡把土富子湖把者至里耶
入北河

冒洞溪 在縣東南六十里平地有一穴水從穴湧出
土人謂水出地中四嚮竽注者曰冒故稱冒洞西南流
數里忽折而東北經金竹坪謝家寨又折而南共數十
里入山洞伏流不知所出

明溪水 在縣西南二百里源出馬鹿山西北流至梘子溝響水洞水自北注之折而西南流卯洞溝水河冲水自東北分注之又西南流至大壩楊家寨水自東注之至善人壩新寨溝水自北注之折而東流至貴塘壩與古道溪水合復折而西南流入北河

二梭水 出上梭溝鵬子岩又梭西湖水出王端岡賈田溪水出哇哇潭俱歸卯洞入白水河

青江溪 在縣南五十里

紅岩溪 在縣東九十里

龍山縣志

卷之三

山水

十八

紅腳溪 在縣南九十里

石馬洞 在馬洛里洞有三門中寬廣門皆狹長如竇初入行十數武右有穴黝而深左爲民築堰引水出漑田者水自中洞來循左堰流洞外水束堰中無涓滴及於穴然嘗伏穴聽之其底有流水瀼瀼去來莫測也時忽巨聲起如雷鳴數四乃靜踰二門至中洞瀦水爲巨潭左右壁斜立頂高起如螺房有水自頂上懸注潭中莫測其源所自循潭右過踰三門數武有石馬向內立尻尾連石壁俯其首有水自口中出亦莫測其源旱時

求雨者入至石馬前以器承口中水如水有魚蝦卽持出洞雨隨而至旣沾足仍以魚蝦還洞中

花果洞 在馬洛里距洞半里有深澗石梁跨之形端整類石工斲成者土人名自生橋洞外多桃樹花時紅英繽紛豔如霞綺秋初結實紅而碩遠望纍纍懸樹間至其下則枝葉交翳尋之無所得洞故以此名洞口斜而長如偃半月洞內皆石田方罫縱橫田底貯黃泥水澄渟常滿或戲涸之越日滿如故洞頂絕漈無巖溜不測水何自來也洞右有石級循而升復有洞如樓樓面龍山縣志

卷之三

山水

十九

細沙閃閃作碎金色沙中多巨人跡或曰仙也樓奧黑處有一隙炯然窺之隱隱見天日光時出洞上擬其處尋之亦不見有隙通於外也

仙人洞 有二一在馬洛里白河岸懸崖上地嶮巖人鮮至者洞中有石正方如棹棹上石紋理縱橫如棋枰左右兩石人相對俯作圍棋狀旁列石臼石竈石茶甌各物工緻類人造者乾隆間有某氏家貧事父母孝日負薪以養然時缺乏難濟一日至洞見石臼中有米持以歸食其父母自茲日至日得米如前及父母没仍入

洞視其臼則空無有矣一在本城里並臨白河岸險削亦同洞口朱欄縱六橫七時壞則下沉於河越日復易新者其縱橫如故洞內有盤盃箸之屬皆金銀爲之一牧童由山頂縋下見之袖其一以歸後遂不復見

石牌洞 在白巖里洞內卽巨潭三面壁削人不能深入初有牌立洞中乾隆間里人乘水落拙出之拭而視其字皆古篆文並剝蝕不可辨未知爲何代物何人製者今其牌存某園中洞之名故以此洞臨河然獨詭異不可測時河水暴漲而洞中涓滴不流時大旱河竭而龍山縣志

卷之三 山水 二十

洞忽洪流噴湧昔有人晨起見洞上叢棘處立一物俯而食初謂牛也其物旋昂首眦之則頂額鼻各載一角方駭異其物忽顧有人卽下入洞中不復見或曰犀也前水之變者物爲之

長潭洞 在馬洛里洞距白河二十丈地底有穴與河通其洞自上而下水陰深多大魚魚色青黑細鱗方口與河魚殊然在洞中不可得出於河始得之有夜釣於洞者一時筠籃爲滿喜甚轉歸燈下視之則盡木葉也然其魚不常出於洞道光丙午春大出河上下十數里

皆得之約幾千數是年遂大荒後里人以魚之出否卜歲豐荒皆驗

土車洞 在大喇里洞有三竇然上下直相次自山頂至山腰腹無左右偏若垂繩度而鑿之者山足有深澗三洞水出聯爲一如匹練懸注落澗中乃流去中下兩洞如常獨上洞異里人以卜晴雨時久雨或黑夜見洞口有紅光如爐火越日卽晴久旱萬里天無雨跡而洞中忽湧洪流卽雨

卯洞 在縣西南九十里有大洞正洞大洞內有石磨龍山縣志 山水 二十一
龕碁枰香爐岩諸奇勝洞門廣十數武正洞周圍半畝中有石几上有石菩薩旁侍神女作鞠躬奉侍狀石上倒垂蓮花數十瓣中有四靈石龍鳳龜麟毛介栩栩欲動

子午洞 在縣南明溪里貴堂壩下洞口甚隘中稍廣深數里歲旱禱雨輒有驗水自洞出每日子午二時大漲過時卽消

犀牛洞 在縣東六十里黃連界山腰洞口濶丈餘內深黑入洞里許有池昔人至池畔聞有物鬪水聲洶湧

從洞口流出皆泥汁踰刻卽澄碧氣腥至今水色日猶數變相傳中有犀牛云

熱水洞 在縣東北一百二十里水如湯可澡浴相傳內有石盤石几石榻諸蹟莫能移置居民浣濯咸便之今爲沙石堆塞

米洗哈洞 一名了义斗中有石笋石柱石鼓相傳從前有神巫祈雨仗劍搖銅鈴聳身躍石壁上形軀遂合并焉至今遺像如生洞約二十餘里穿他砂里

佛潭 在縣北三十里峭壁千尋上刻古佛數尊眉髻

龍山縣志

卷之三

山水

二十二

如畫左鑄有記僅餘咸康元年五月六字文多不可辨居人倚石壁建閣稱盛境焉按東晉成帝十年改元咸康五代蜀主王衍亦建元咸康然衍未踰年爲唐所滅此咸康當是成帝年號至今千五百餘歲矣

天堰池 在天馬山下袤廣數畝圓如璧水四時不涸久雨大旱無加損頂有佛閣每日鍾鼓聲起游魚喁喁出水面朝暮驗之不爽魚大者長及丈小二三尺漁人釣取之常屏息不語若發聲則悠然逝不可得

仙人板 在縣南一百八十里隆頭河右石山壁立下

臨大江高百餘丈山腰一洞洞口橫木匣長數尺相傳
乾隆初年因旱祈雨有人由山頂縋而下啟視之皆古
篆文字遂稱仙蹟

燕子崖 在魯木車毛章壩地崖頂銀瀑一條飛空而
下約二三千尺每際日與雨交突然虹起青紅掩映真
奇觀也

黑洞 在縣西南六十里

普洗洞 在縣東五里

普那洞 在縣北七十里

龍山縣志

卷之三

山水

二十三

涼風洞 在縣北五十里

清風洞 在縣南一百六十里